

# En auto electric per tots

Gion Nutegn Stgier/FMR

**Chest onn ò l'Ovra electrica Beiva igl giubileum da 90 onns. Cun en auto electric angratzga la societad agls commembers, clients, abitants e giasts per la fidevkladad anvers igl travagl.**

Tgi Beiva ò en'atgna ovra electrica è betg an-cunaschaint a mintgign. Chella ovra è per en po pi viglia tgi l'ovra electrica digl ewz a Tini-zong. Ella è er pi viglia tgi igl Lai da Marmore-ra. Chel è nia surdo agl travagl igl 1954, l'Ovra electrica Beiva chella dattigl gio siva digl 1932. Varsaquants Bivians on fundo da lez taimp chella associaziun e construia cun ella l'ovra tgi sa catta a Stalveder.

## Betg ena festa scu cun 75 onns

Damai ò igl travagl e la corporaziun chest onn igl giubileum da 90 onns. Per la supra-stanza dall'Ovra electrica Beiva è sto cler tgi chel anniversari vegia da neir festivo. Chegl alloura betg scu tigl giubileum da 75 onns cura tgi chel anniversari è nia festivo cun ena gronda festa populara a Stalveder. Da festivar è cun ensatge persistent ed ensatge a lunga vista. Detg e fatg è gio è stada nascheida l'idea da metter a disposiziun per en onn a mintgign e cunzont agls commembers dall'associaziun Impianti elettrici Bivio en

auto electric. Cun UbeeQo, igl Carsharing-Service dall'AMAG ed Europcar ò la corporaziun catto en partenari adatto per chel scopo. Siva digls 1. da fanadour 2022 sa catta segl parcadi da cumegn a Beiva en Skoda Enyak 4x4, tg'è pussebel da piglier a tschains. Igl auto electric è 100% electric, el ò ena bat-tareia dad 80 kw ed eir ins pò cun el 460 kilo-meters eneda tg'el e cargea cun current. Per carger el dovrigl radond otg ouras. A Beiva sa catta digl reminent la pi ferma staziun per carger autos electricas.

## Fatg giu chint vign per oura e per kilometer

A disposiziun stat igl vehichel electric betg angal per las persungas tg'èn commembras dall'associaziun, mabagn dastga mintgign far adiever dad el. Er igls giasts da Beiva on la pussebladad da piglier a tschains chel auto electric. Igl regal da giubileum dall'Ovra electrica Beiva pigls commembers è ensatge singular. Da piglier a tschains igl vehichel electric costa 100 francs per de e fatg giu chint vign per oura e per kilometer. Per eir cuagl auto electric, per piglier a fit el e per reservar el è d'aveir en profil personal tar la firma UbeeQo tg'ins survign sur ena app. Lubient-scha d'eir cun auto ed ena carta da credit èn basignevels. Access tigl auto ins ò sainza clav e sessour è angal da sa tigneir allas ordina-zions tgi vignan dadas antras ena vouch eneda tg'ins è aint igl auto electric.



L'ovra electrica sa catta a Stalveder.

## 82% digl adiever annual

La «Impianti elettrici Bivio» ò salvo la sia radunanza da giubileum. Igls Bivians èn fitg loschs sen lour atgna ovra electrica e chegl gio siva da 9 decennis. President dalla societad è siva digl 2008 Werner Wettstein. El è en om digl rom ed ena persunga tgi veiva per l'ovra electrica. Da preschaint ò la societad Ovra electrica Beiva 55 associias. La corporaziun ò gia en bung onn da gestiun 2021 cun an-tradas dad 1.177 milliuns francs. Igl retgav digl adiever dalla reit chel schea tar 520 000 francs e l'antrada dalla vendita da current chella monta a 667 000 francs. Tar las sorteidas è la compra da current, igls costs dalla reit, taxas e con-tribuzions cun 730 000 francs la cefra ota. Amortisaziuns èn neidas fatgas per ena somma da 141 000 francs. Sa resul-to è alla fegn en gudogn da 59 565 francs. Igl onn da gestiun ò la societad electrica vandia 5.5 milliuns kilowatts current (kWh) e da chels 4 milliuns dall'atgna produziun. Chegl vot deir tgi 82% digl current tg'è nia duvro a Beiva è nia dall'atgna ovra «Impianti elettrici Bivio». Scu tgi Werner Wettstein ò detg ò la societad investo igls davos onns anfi-gnen ossa 1.1 milliuns francs per metter las lengias digl current sot tera. Chegl agl Camon, Val Beiva, Cavreccia ed actualmaintg a Stalveder ed alla Casa Bianca. El ò er oriento tgi anfignen igl 2027 vegian da neir ramplazzos tot igls dumbraders d'electric. A Beiva seian chegl 500 tocs. (fmr/gns)



Sa legran dalla surdada digl auto electric. (da san.) Giancarlo Torriani, Werner Wettstein e Luzi Giovanoli dalla suprastanza Ovra electrica Beiva. Fotos Gion Nutegn Stgier